

3


CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

SEP 15 1962

J 5725/4298









廿一史彈詞註卷之四

成都楊 慎用修編著

漢陽張三異禹木增定

男仲璜別麓註 孫坦驄青御校

第四段 說三分兩晉 西江月

道德三皇五帝功名夏后商周英雄五伯鬧春秋秦漢  
興亡過手 青史幾行名姓北邙無數荒坵前人田地  
後人收說甚龍爭虎鬪 詩曰

虎鬪龍爭勢若何百年豪傑苦無多將軍老在秋江  
上手撚銀髭作浩歌

一自沙場戰罷歸劒芒生澀馬空肥風穿伏虎蓮花

哈佛大學漢和  
圖書館珍藏印



帳塵鎖蟠龍帥字旗戰策兵書慵再展龍韜虎略有  
誰知昨宵夢到相持處血迸金鎗污鐵衣

詩出大才閒遣興話談今古要分明夜來說到遊春  
處今日還尋載酒人載酒尋花饒意興談今論古費  
評論書中有女顏如玉傅粉塗朱未算真朱粉回頭  
如一夢好書一字價千金千金難買閒風月百歲空  
爭虛利名誰會誰能誰不濟幾行青史見原因功名  
總是虛脾漢成敗誰非錯用心若箇長沙悲賈傅幾  
人楚澤弔靈均勸君莫為閒愁老漫把新詞聽一巡  
早來說秦漢兩朝故事秦始皇併吞六國以來止有二  
十五年至子嬰亡國漢高祖亡秦滅楚至東漢獻帝之

末享國四百十一年天下三分曹丕篡漢稱魏劉備併

取劉璋孫權自稱吳王各有長短

蜀漢者劉備即位於西蜀自稱漢帝章武 在位三年後謚為

昭烈皇帝傳其子後主劉禪建興 延熙 景耀 在位四十年通共

四十三年降於魏而漢亡

魏者曹操初封魏王子丕篡漢是為魏世祖文帝黃初 在

位十年傳其子

明帝叡太和 青龍 景 在位十三年齊王芳正始 嘉平 在位十四年

高貴鄉公髦正元 甘露 在位六年陳留王璜景元 咸熙 在位六年

凡五主共五十六年禪於晉而魏亡

吳者孫權據江東為吳大帝黃武 黃龍 嘉禾 赤 在位二十三年



傳其子

會稽三亮

建興 五鳳 太

景帝休

永安 在位六年

烏程侯皓

元興 甘露 寶鼎 建衡 鳳皇 天冊 天璽 天紀 在位十七年

凡四主共五十九年降於晉而吳亡蜀魏吳謂之三國

曹魏先滅了蜀漢又五年晉王司馬昭專權其子司馬

炎方篡了曹家又過十六年滅了東吳天下一統俱歸

於晉晉又分東西兩代

西晉者司馬炎有天下是為晉武帝泰始 咸寧 泰 康 在位二十五年

年傳之

惠帝

永熙 元康 永康 永寧 太 安 光熙 永興 在位十七年

懷帝

永嘉 在位六年

愍帝

建興 在位四年

凡四主共五十三年懷愍先後蒙塵為劉聰所滅

東晉者瑯琊王司馬睿相傳小吏牛金通其母夏侯妃

所生冒司馬氏之姓渡江南來是為晉元帝建武 永昌 大 興

在位六年傳之

明帝

大寧 在位三年

成帝

咸和 咸康 在位十七年

康帝

建元 在位二年

穆帝

永和 升平 在位十七年

哀帝

隆和 興寧 在位四年

廢帝

太和 在位六年

簡文帝

咸安 在位二年

孝武帝

寧康 太元 在位二十四年

安帝

隆安 元興 義 熙 在位二十年

恭帝

元熙 在位二年

凡十一主通共一百零四年宋劉裕篡奪而亡



今將三國并西東二晉一百九十九年君臣事要略且

品題少資清聽

三國分事頭多不相統制

賭神通憑手段各用能人

觀國勢據中原曹丕篡漢

曹丕篡漢據有中原陳壽三國志以天下之制與魏以列國待漢通鑑因之以魏紀年司馬公曰漢傳於魏而晉受之不得不取其年號以紀其國之事昭烈雖云中山靖王後然不能紀其世次不敢以紹漢氏之遺統也

論君臣依正理漢主為尊

尹氏曰曹丕篡位漢祚無主昭烈帝室之胄正位於蜀紹漢承統名正言順朱子作綱目以昭烈承獻帝後蓋取春秋之義示天下萬世之正論也

劉先主擅梟雄拊髀人物

按名號例曰凡正統之君秦漢以下曰帝無統之君漢以後稱帝者曰某主陳壽志三國以正統子魏志昭烈稱劉先主綱目革其號大書昭烈皇帝初昭烈詣孫權求都督荊州周瑜疏曰劉備擅梟雄之資而有關張熊虎之將恐蛟龍得雲雨終非池中物也備嘗流涕對劉表曰吾嘗身不離鞍髀肉皆消今復不騎髀裏肉生日月如流老將至矣而功業不建是以悲耳梟勇往也仲馬曰謂善鬪也史炤曰猶如陸博得梟者勝雄武備也諡法明德有勞曰昭有功安民曰烈

百遭輸志不折新野屯兵

備初依公孫瓚得為平原相陶謙表為豫州刺史謙卒命迎備遂兼領徐州袁術爭徐州呂布襲之備降於布左將軍旋起兵徐州討操敗奔袁紹復為操殺於汝南奔劉表表令屯新野操下荊州備走夏口蘇子由曰方其奔走於二袁之間困於呂布狼狽於荊州百敗而其志不折



伸大義訪賢才草廬三顧

瑯琊諸葛亮寓居襄陽隆中自比管仲樂毅備訪賢士於司馬徽徽告以諸葛孔明龐士元備欲召之徐庶曰此人不可屈致宜枉駕顧之三往亮始見因曰漢室傾頽孤欲信大義於天下計將安出亮曰曹操不可與爭鋒孫權可與為援而不可圖也荆州用武之地而其主不能守益州劉璋闇弱智能之士思得明君將軍信義著於四海若跨有荆益西和諸戎外結孫權天下有變命一上將將荆州之軍以向宛洛將軍率益州之眾出秦川則霸業可成漢室可興矣後亮上後主出師表曰臣本布衣躬耕南陽苟全性命於亂世不求聞達於諸侯先帝猥自枉屈三顧臣於草廬之中由是感激遂許先帝以驅馳瑯琊在青州府諸城縣襄陽府名屬湖廣隆中在襄陽府城西北二十五里下有隆中書院益州今四川成都府宛今南陽府洛即洛陽秦川長安正南山名秦嶺水流出秦川又關中別號為秦川司馬徽字德操徐庶字元直諸葛亮字孔明龐統字士元

起臥龍偕雛鳳魚水同心

襄陽龐德公嘗謂孔明為臥龍士元為鳳雛至是司馬徽語備備得亮情好日密關張不悅備曰孤之有孔明猶魚之有水也龐士元初為耒陽令魯肅致書云士元非百里才備與語大器之用為治中親待亞亮並為軍師中郎將尹氏曰當漢之末士之隨世就功名者多矣孰謂一世龍如孔明者方且高卧隆中抱膝長吟畧無意於當世使昭烈不垂三顧之勤則將槁死巖穴耳及其一起君臣既合魚水同權其與聘莘野訪渭濱者如出一轍耒陽縣名屬衡州府

敗長坂走江陵人心愈固

初劉表二子琦琮表為琮娶其後妻蔡氏之姪遂愛琮而惡琦出琦為江夏太守表卒琮嗣未幾曹操軍至新野琮舉州降操遂進兵時備屯樊城琮降而不以告備久乃覺則操已在宛矣或勸備攻琮荆州可得備曰劉荆州托我以孤遺背信自濟死何以見劉荆州乎將其眾去荆州人多歸之或曰宜速行保江陵備曰濟大事必以人為本今人歸吾吾何忍棄去操以江陵有軍實恐為人所據將精騎追及當陽之長坂備棄妻子與孔明等數十騎走張飛拒後據水斷橋操不敢近趙雲抱備子禪與關羽船會得濟沔遇



劉琦眾萬餘人與俱到夏口 長坂在當陽縣江陵  
縣名屬荊州樊城在襄陽府城北當陽縣名屬安陸  
府夏口在武昌府荊江中正對沔口沔水在漢陽  
府城西南三十里源出襄水南入江與漢水合

### 結孫權鑿赤壁倭傑雲蒸

初孫權聞劉表卒遣魯肅說備撫表眾同心敵操比  
肅至南郡而琮已降肅迎備於長坂宣權意且曰孫  
討虜兵精糧多今為君計莫若遣心腹自結於東以  
共濟遂同進住樊口操順江東下備遣諸葛亮隨肅  
見權說之肅請召周瑜定計瑜至權意始決遂以瑜  
督三萬人與備併力迎操遇於赤壁操引次江北瑜  
部將黃蓋曰曹軍方連船艦可燒而走也乃取蒙衝  
鬪艦載燥荻枯柴灌油其中裹以帷幕上建旌旗預  
備走舸繫於幕尾先書遺操詐云欲降時東南風急  
蓋以十艦著前餘船次進去北軍二里同時火發火  
烈風猛船往如箭燒盡北船延及岸營人馬燒溺殆  
盡瑜等率輕銳斷其後雷鼓大進操引軍走備瑜水  
陸並進追至南郡操軍死者大半備遂徇荊州江南  
諸郡皆降初備訪士於司馬徽徽曰儒生俗士豈識  
時務識時務者在乎倭備自新野南奔荆楚羣士  
從之如雲 赤壁山名在武昌府東南九十里一說

在蒲圻縣西北二十里北岸烏林與赤壁  
相對南郡即荊州府樊口在武昌縣西

### 併劉璋馘夏侯跨連荆益

時劉璋為益州牧益州司馬張魯以璋闇懦遂據漢  
中校尉法正與別駕張松知璋不足有為勸璋迎備  
討魯璋遣正至荊州迎之正與龐統陰說備速取益  
州既至璋迎於涪增兵使擊魯備到葭萌厚樹恩德  
以收眾心適操攻權權呼救備索兵糧於璋璋半給  
之備怒遂進兵據涪城璋遣吳懿等拒之敗降旋克  
雒城進圍成都璋出降遷於公安備自領益州牧後  
操取漢中張魯降操還以將軍夏侯淵守之法正說  
備取漢中備遂進兵操遣曹洪同淵拒之備營於定  
軍山淵引兵爭之法正曰可擊矣備使黃忠乘高鼓  
譟攻之遂擊斬淵操聞之自臨漢中備遣趙雲擊敗  
之操引還遂取漢中備是時已併有荆益之地跨連  
荆益又註見草廬三顧句下 涪漢縣名今成都府  
綿州葭萌今保寧府廣元縣雒城今漢州屬成都府  
公安縣名屬荊州府定軍山在漢  
中府沔縣東北山有諸葛巖在焉

### 任關張黃趙馬五虎馳名



河東人關羽與備誓同生死曹操擊備備敗走操困羽使張遼說之羽降封為漢壽亭侯袁紹攻操羽於萬軍中斬其大將顏良立效報操盡封其賜拜書告辭而奔備於袁軍後備取益州使羽鎮荊州羽攻曹仁於樊城擒操將于禁殺龐德威震華夏拜前將軍世號虎臣涿郡張飛少與羽俱事備結義桃園操追備及於長坂飛據水斷橋瞋目橫矛曰身是張翼德可來共決死敵無敢近故得免備入蜀使飛攻巴郡義釋太守嚴顏諸城望風降附封右將軍後進車騎將軍魏謀臣程昱等咸稱飛為萬人敵南陽人黃忠初備南定諸郡忠以長沙降後從入蜀每先登陷陣勇貫三軍擊斬操將軍夏侯淵以功賜爵關內侯常山人趙雲先詣公孫瓚備見而奇之深加結納雲隨備至平原為備主騎兵後備為操所追棄妻子走雲抱備子禪保護濟沔及與操爭漢中雲將數十騎前突其陣且鬪且却入營開門偃旗息鼓操兵引去雲以勁弩尾射魏兵自相蹂踐死者甚多備曰子龍一身都是膽也累遷翊軍將軍封永昌亭侯茂陵人馬超初與關中諸將反據潼關為操所敗奔漢中歸張魯超知魯不足計事亦來請降以功封定西將軍遷左將軍至是備即漢中王位並以五虎將軍關羽河東今山西蒲州涿郡今涿州常山今真定府關羽

字雲長張飛字翼德黃忠字漢升趙雲字子龍馬超字文超

### 建安絕章武興漢中即位

建安獻帝年號建安二十五年冬十月曹丕廢帝篡位蜀中傳言獻帝遇害漢中王發喪制服次年夏四月羣臣勸稱尊號漢中王乃即皇帝位改元章武元年

### 把一隅承大統枝葉彰明

按陳壽志昭烈涿縣人中山靖王勝之後勝子正元狩六年封涿縣陸城亭侯坐酎金失侯因家焉祖雄父弘生昭烈其世次本末甚明建安既絕昭烈正位蜀漢親承大統夫復何疑凡帝王家子孫世謂金枝玉葉陳氏曰詳慎如温公而以昭烈為不能紀其世次寧以正統屬之篡弒之賊魏涑水之論亦偏矣

### 因愛將討孫權虎亭失利

帝令關羽取襄陽水滄曹軍自許以南往往遙應威震華夏操議徙許都以避其銳後用司馬懿之計遣使約孫權躡其後權以陸遜代呂蒙將其軍蒙陰以計入江陵羽還將吏無鬪心羽走兵散僅十餘騎權



先使潘璋斷其徑路馬忠獲羽及子平俱被害帝聞羽沒自將討權張飛自閬中率萬餘人會江州臨發為帳下張達范疆所殺以其首奔權帝進兵自江南緣山截嶺軍於獠亭為吳陸遜所敗獠亭即今荆州府宜都縣也閬中縣名今屬保寧府江州今重慶府巴縣獠音效

### 一把火被折辱陸遜書生

孫權以陸遜為大都督拒帝諸舊將各矜恃不聽遜按劍曰彼曹操所憚今在境界乃強對也僕雖書生然國家屈諸君使相承望者以僕尺寸可稱耳各任其事軍令不可犯也諸將乃服帝自巫峽建平連營至彝陵界立數十屯與吳相拒數月遣吳班將數千人於平地立營遜度帝兵疲意沮乃進擊漢軍先攻一營不利遜曰吾已曉破之術敕各持一把茅以火攻拔之遂率諸軍同時俱攻破四十餘營土崩瓦解舟械軍資略盡帝夜遁大慙恚曰吾乃為陸遜所辱豈非天耶又象山集曰陸遜吳中年少書生耳巫峽在夔州府巫山縣東即巫山也與西陵歸峽並稱三峽連山七百里建平今歸州彝陵州名屬荊州府陸遜字伯言吳郡人

### 白帝城駐御營幽憂病篤

帝敗遁僅得入白帝城病篤白帝城在夔州府公孫述據蜀自稱白帝因名

### 永安宮託孤詔地慘天昏

諸葛亮至永安帝病篤命亮輔太子謂亮曰君才十倍曹丕必能安國終定大事嗣子可輔輔之如不才君可自取亮泣曰臣敢不竭股肱之力效忠貞之節繼之以死帝又詔敕禪曰勿以惡小而為之勿以善小而不為惟賢惟德可以服人汝父德薄不足效也汝與丞相從事事之如父遂崩於永安宮亮奉喪還成都永安縣名公孫述更名白帝城有永安宮先主改永安縣

### 劉後主信阿衡通吳報使

昭烈崩太子禪即位考異曰帝禪綱目仍書後主與齊高緯陳叔寶同稱則為無統之主而非正統之帝也陳壽志昭烈稱先主綱目已改稱昭烈皇帝而後主未革其號蓋當時錄者因史舊文而朱子偶未及改也禪封諸葛亮為武鄉侯領益州牧遣尚書鄧芝使吳初吳為昭烈所攻權降魏魏封權為吳王至是



鄧芝使吳權不見芝曰臣來亦為吳非但為蜀也權見之芝曰大王命世之英諸葛亮一時之傑蜀有重險吳有三江共為唇齒進可兼併退可鼎足若委質於魏魏必求太子入侍不從則奉辭伐叛蜀亦乘之吳遂絕魏專與漢和使張溫報聘自是信使不絕武鄉縣名鄧芝字伯苗新野人

### 乘閒暇征瀘水孟獲南擒

初益州郡耆帥雍闓等殺太守附吳又使郡人孟獲誘扇諸蠻牂牁越巂皆叛亮以新遭大喪撫而不討務農殖穀閉門息民三年始率眾征之至南中所在戰捷由越巂入斬闓等孟獲素為蠻漢所服收餘眾拒亮亮募生致之既得使觀營陣獲曰向不知虛實故敗今祗如此即易勝耳乃縱使更戰七縱七擒亮猶遣獲獲止不去曰公天威也南人不復反矣瀘水在四川行都城南其水深廣而多瘴春夏常熱其源可燭雞豚武侯渡此為文以祭陣亡者牂牁西夸地越巂漢郡名今俱屬西川南中西南夸之中也

### 前後次出師表木牛流馬

建興五年亮出屯漢中以圖中原臨發上疏曰先帝創業未半中道崩殂今益州疲敝此誠危急存亡之秋也然侍衛之臣不懈於內忠志之士忘身於外者蓋追先帝之殊遇欲報之於陛下也宜開張聖聽以光先帝遺德恢弘志士之氣宮中府中俱為一體侍郎郭攸之費禕董允等志慮忠純宮中之事悉以咨之將軍向寵曉暢軍事營中之事悉以咨之先帝三顧草廬奉命於危難之間邇來二十有一年矣先帝知臣謹慎故臨崩寄臣以大事也夙夜憂懼恐托付不效以傷先帝之明故五月渡瀘深入不毛今南方已定當獎率三軍北定中原庶竭駑鈍攘除奸凶興復漢室此臣報先帝而忠於陛下之職分也陛下亦宜咨諏善道深追先帝遺詔今當遠臨臨表涕零遂率兵出祁山參軍馬謖與魏將張郃戰於街亭違亮節度敗績而還十二月亮復伐魏羣臣難之亮又表曰先帝以漢賊不兩立王業不偏安故託臣以討賊固知臣才弱敵強然不伐賊王業亦亡坐而待亡孰與伐之是故託臣而弗疑也臣思惟北征宜先入南故渡瀘深入非不自惜也顧王業不可偏安於蜀都故冒危難以奉先帝之遺意也今賊適疲於西又務於東兵法乘勞此進趨之時也而欲以長計取勝坐定天下此臣未解也臣到漢中期年已喪



突將武騎一千餘人皆數十年糾合四方之精銳非一州之所有若復數年則損三分之一當何以圖敵乎臣鞠躬盡力死而後已至於成敗利鈍非臣之明所能逆覩也引兵出散關圍陳倉糧盡引還魏將軍王雙追亮亮擊斬之亮勸農講武作木牛流馬運米集斜谷口治邸關息民休士三年而後約吳同舉伐魏出軍至祁山始以木牛運後出斜谷以流馬運牛御雙轅人行六尺牛行四步人不大勞牛不飲食流馬形制如象皆以機為行止進軍渭南屯五丈原魏司馬懿拒守不出亮分兵屯田為久駐計祁山在鞏昌府西和縣北街亭在隴西縣散關在鳳翔府寶雞縣南大散嶺下有關通褒斜大路陳倉即寶雞縣斜谷在漢中府褒城縣北谷中路連南北故名渭水名在寶雞縣治南五丈原在鳳翔府郿縣西王圻曰木牛即今小車之有前轆者流馬即今獨推者是武侯造以運餉便於登陟民間謂之江州車子

### 狠仲達甘巾幘只不交兵

魏遣司馬懿禦亮亮數挑戰懿斂軍依險兵不得交亮乃遺以巾幘婦人之服懿怒上表請戰亮曰彼本無戰情所以固請者故示武於眾耳將在軍君命有所不受豈千里而請戰哉巾幘婦人喪冠也懿

字仲達

### 葫蘆谷用奇謀天燒不着

懿久不出亮使司馬魏延誘之引懿入葫蘆谷亮遣將馬岱壘斷谷口縱火燒之藥包齊發懿及子師昭俱聚哭受死忽大雨如注火滅懿出走還保營亮歎曰謀事在人成事在天此出三國演義正史不載

### 五丈原長星落漢火消沉

亮屯五丈原病篤有大星赤而芒墜營中三投再還俄而亮卒王荊公武侯篇崎嶇巴漢間屢以弱擊強暉暉若長庚孤出照一方亮既卒長史楊儀整軍而出懿追之儀反旗鳴鼓若將向懿者懿不敢逼諸軍還成都謚亮曰忠武年五十四漢以火德王亮死則漢必亡矣

### 姜車騎繼祁山中原九伐

亮初出祁山天水參軍姜維詣亮降亮美其膽智使典軍事亮卒維以監軍拜車騎將軍旋為衛將軍與費禕并錄尚書事禕卒以維為大將軍初維負其才武每欲大舉禕常裁制不從曰丞相猶不能定中夏



况吾等乎及禕死維得行其志先亮伐魏六出祁山  
至是維繼亮出師凡九伐中原每為魏安西將軍鄧  
艾所敗祁山在鞏昌府西和縣北七  
里山上有城姜維字伯約天水人

### 老譙周讐國論還欠公平

時維數出兵蜀人愁苦光祿大夫譙周作讐國論諷  
之畧曰既非秦末鼎沸之時實有六國並據之勢可  
為文王難為漢祖夫民之疲勞則騷擾之兆生上慢  
下暴則瓦解之形起時可而後動數合而後舉故湯  
武之師不再戰而克誠重民勞而度時審勢也如極  
武黷征不幸遇難雖有智者不能謀之矣尹氏曰姜  
維屢舉伐魏進寸退尺而用兵不已當時譙周輩皆  
為隱憂然用兵以討讐賊固非貪忿之舉雖敗猶榮  
也譙周字  
允南廣安人

### 寵黃皓疎忠謀陰平失守

### 懸崖寇來鄧艾無計支撐

宦官黃皓便佞有寵遷中常侍操弄威柄與右大將  
軍閻宇親善欲廢姜維而樹宇維知言於帝曰皓奸

巧專恣請殺之帝曰皓趨走小臣耳何足介意敕皓  
詣維謝維見皓枝附葉連由是疑懼因求種麥沓中  
不敢歸成都後魏以鍾會大舉入寇姜維表請遣左  
右車騎張翼廖化分護陽安關口及陰平之橋頭黃  
皓信巫鬼謂敵終不自致啓帝寢其事羣臣莫知鄧  
艾自狄道趨沓中以綴維鍾會從斜谷趨漢中使兵  
徑趨陽安關口守將傅僉鬪死會長驅而前維聞會已  
入漢中合衆欲赴關城聞其已破乃退守劔閣會道  
攻劔閣不克欲引還艾言賊已摧折宜遂乘之乃自  
陰平行無人之地七百餘里鑿山通道造作橋閣山  
高谷深艾以毡自裹推轉而下將士乃攀木援崖魚  
貫而進艾已入平地漢人不知魏兵卒至不為城守  
或勸帝奔吳或勸帝入南中譙周請降乃率羣臣面  
縛輿觀詣艾降陽安關口在成都府簡州劔閣在  
保寧府劔州陰平道在陝西鞏昌府  
文縣乃秦蜀門戶鄧艾字士載

### 諸葛瞻北地王身殉社稷

瞻亮子也初鄧艾自陰平入衛將軍瞻督軍拒艾於  
綿竹戰死瞻子尚曰父子荷國重恩不早斬黃皓使  
敗國殄民用生何為亦冒陳死帝出降帝子北地王  
堪怒曰便當父子君臣背城一戰同死社稷以見先



帝可也奈何降乎帝不聽謀哭於昭烈廟先殺妻子後自殺綿竹縣名屬成都府瞻字思遠

### 如斗膽空割裂天日終沉

鄧艾入成都頗矜伐鍾會有異志姜維知之欲搆成擾亂說會使反情好權甚因艾承制專事乃與監軍衛瓘密白艾反狀詔以檻車徵之瓘即夜至成都收艾及子忠艾既就擒會遂決意謀反會郭太后卒會悉召諸將為太后發哀稱遺詔使起兵廢司馬昭使所親信代領諸軍所請諸將悉閉益州諸曹屋中姜維欲使會盡殺北來諸將已因殺會復立故漢帝密書與帝曰願陛下忍數日之辱臣欲使社稷危而復安日月幽而復明會欲從維言誅諸將猶豫未決護軍胡烈子淵率父兵鼓譟赴城所閉諸人皆緣屋出共斬會及維剖維腹膽大如斗艾將士欲追還艾瓘遣田續襲艾父子斬之

### 此間樂佯不思先人墳墓

帝禪降魏舉家遷洛陽惟秘書令郤正及殿中督張通舍妻子單身從行他日與宴作蜀技人皆感愴而禪喜笑自若晉王昭問曰頗思蜀否對曰此間樂不思蜀也正聞之謂曰若王復問宜泣答曰先人墳墓遠在岷蜀乃心西悲無日不思因閉其目會昭復問禪對如正言昭曰何乃似郤正語也禪驚視曰誠如尊命左右皆笑之岷山在成都府茂州郤正字令先

### 安樂公傳數祀煞有深心

劉祥曰此間樂晉武以為大愚雖諸葛亮不能輔况姜維乎獨楊升庵以為佯狂自保得長為安樂公此乃阿斗知己魏封禪為安樂公至晉武帝泰始七年卒

### 中原地魏曹丕承其父業

魏都洛陽為中原地建安二十五年曹操卒太子丕自為丞相冀州牧是年篡漢

### 篡炎劉即帝位國運初興

漢帝姓劉以火德王外史載有老者祭古墳祝曰炎炎之靈其棟將頽田為戰場奸雄啼人訊其故化為鳩不篡漢即皇帝位是為魏文帝

### 改年號為黃初建都西洛



不改獻帝建安二十五年為黃初元年營洛陽宮室都於洛

### 要吞吳無計策幾度勞心

初丕問賈詡曰吾欲伐不從命者以一天下吳蜀何先詡曰臣料羣臣無備權之對雖以天威臨之未見萬全之勢也不不納於昭烈章武二年自將擊吳進攻濡須不克引還至建興二年丕復以舟師擊吳御龍舟至廣陵吳將軍徐盛列舟艦於江植木衣葦為疑城假樓丕望歎曰雖有武騎千羣無所用之會暴風至龍舟幾覆乃還三年復伐吳丕臨江觀兵吳嚴兵固守丕見波濤洶湧歎曰固天所以限南北也仍還濡須水名在廬州府巢縣南廣陵今揚州

### 貶陳思燃荳其同根煎逼

操死子陳王植不奔喪丕縛至欲罪之植作詩曰煮荳燃荳其荳在釜中泣本是同根生相煎何太急植母卞氏出曰何逼弟太急耶丕貶陳思王為安鄉侯曹植字子建操次子十歲能文才敏七步世目為繡虎封陳王謚曰思

### 蔑天倫禽獸行廣肆淫烝

曹操諸姬不淫烝殆盡無一免者丕偶病母卞太后往問見左右皆昔年侍者不入而罵曰狗鼠不食汝餘死固應爾

### 違父言寵司馬養留禍種

### 狼顧相同槽夢怪兆先徵

曹操察懿有雄豪志聞有狼顧相欲驗之乃召使前行反顧面正向後而身不動又嘗夢三馬同食一槽甚惡焉因謂丕曰司馬懿非人臣也必預汝家事不素與懿善每相全佑故免懿及操卒丕寵任懿為尚書僕射鎮許昌後以懿同曹爽受遺詔輔政卒之勒兵武庫廢篡相仍子孫蒙禍迹其猜忍符於狼顧之相竟遷魏鼎兆徵同槽之夢焉野客叢談云狼喻最多言其恣食曰狼餐亂走曰狼竄專悞曰狼狼不恤曰狼戾恣取曰狼貪威顧曰狼顧不檢曰狼籍乖謬曰狼狽

### 寵其妾殺其妻幾乎害子



丕先從操入鄴悅素熙妻甄氏操為聘焉生子劼為平原王後納郭永女為貴嬪有寵適丕病郭氏讒甄后有鎮魘之謀遂殺甄后后死故劼未建為嗣丕立郭氏為后劼事后謹后亦愛之郭后無子丕使郭母養劼 丕后名郭女王

### 獵園中聞泣諫改念全恩

劼母被誅適丕與劼獵見子母鹿丕射其母命劼射其子劼泣曰陛下已殺其母臣不忍復殺其子丕惻然遂立為太子

### 魏明帝料功能容言納諫

丕卒太子劼即位是為明帝劼沈毅明敏任心而行簡功能屏浮偽雖犯言極諫皆優容之無所摧戮嘗卒至尚書門司空陳矯問曰陛下何之曰欲案行文書耳矯曰此自臣職分非陛下所宜臨劼慙而反

### 作都官考課法黜陟群臣

劼深疾浮華之士吏部尚書盧毓曰考績之法廢而以毀譽為進退故真偽混襍虛實相蒙劼納其言詔

放騎常侍劉邵作考課法邵作都官考課七十二條下百官議黃門侍郎杜恕曰明試以功三考黜陟帝王之盛制也然世有亂人而無亂法今欲使州郡考士必由四科皆有事效然後察舉試辟公府為親民長吏轉以功次補郡守者或就增秩賜金此最考課之急務也議久不決事竟不行

### 更可惜薄宗藩維城無衛

魏自黃初以來諸侯王皆寄地空名國不聽朝聘設防輔監察之官以伺察之雖有王侯之號儕於匹夫法禁嚴切吏察之急親姻皆不相通問宗室曹回上書曰古王者建同姓以明親親樹異姓以明賢賢親疎并用故能保其社稷今州郡牧守皆跨有千里而宗室子弟王虛空之地非所以強幹弱枝備萬一之虞也不聽東阿王桂疏曰今陛下惠洽椒房恩昭九族至於臣者禁錮明時婚媾不通兄弟乖隔又以一切之制永無朝覲之期願陛下使諸國慶問四節得展妃妾之家膏沐之遺歲得再通乃令諸王及宗室公侯朝明年正月後如先帝令孫盛曰魏明帝政自已出優禮大臣君人之量偉矣然不思建德垂風以固維城之甚至使大權偏據社稷無衛悲夫



侈宮室空帑藏鑄造銅人

獻好土功先作許昌宮又治洛陽宮起昭陽太極殿  
築總章觀高十餘丈復立崇華殿更名九龍通引穀  
水過殿前為玉井綺欄蟾蜍舍受神龍吐出使博士  
馬鈞作司南車水轉百戲作者三四萬人起土山於  
芳林園使公卿皆負土樹襍木善草捕禽獸實其中  
又徙長安鍾簾素佗銅人承露盤於洛陽盤折聲聞  
數十里銅人重不可致大發銅鑄銅人二號曰翁仲  
列坐於司馬門外又鑄黃龍鳳凰置內殿前尚書衛  
覬上疏曰武皇帝之時後宮食不過一肉衣不過錦  
繡用能平定天下今宜計較府庫量入為出而工役  
不休侈靡日崇帑藏日竭昔漢武信神仙之道立仙  
掌以承高露陛下每所非笑今無求於露而空設之  
靡費宜裁制也不聽芳  
林園在河南府城東北隅

立養子齊王芳爽懿共政

獻無子養芳詢為已子宮省事秘人莫知其由來立  
芳為齊王詢為秦王獻病篤司馬懿入見獻執其手  
曰吾以後事屬君君與曹爽輔少子死乃可忍吾忍  
死待君得相見無限矣召二王示懿別指芳曰此是

也君諦視之又教芳前抱懿項獻卒芳嗣位年八歲或云芳任城王楷之子也

伏獸睡突時發何鄧駢刑

何晏鄧颺素與曹爽善爽輔政引為心腹時爽懿各  
更宿殿內何鄧謂爽曰重權不可委人爽從之以懿  
為太傅懿遂謝病屏居爽所親李勝出刺荆州過辭  
懿懿令兩婢持衣衣落婢進粥懿不持杯而飲粥流  
沾胸語多錯亂誤以荆為并者再勝退告爽曰懿尸  
居餘氣不足慮也爽不復設備時傅元與晏颺不睦  
晏等每欲害之時人莫肯共婚嚴憲女韡有淑德元  
求為繼室憲許之或曰何鄧執權必為元害亦猶排  
山壓卵以湯沃雪耳憲曰晏等驕侈必當自敗司馬  
太傅獸睡耳吾恐卵破雪消行自有在後芳謁高平  
陵爽等皆從懿與子師昭謀以皇太后令閉諸城門  
勒兵據武庫奏爽棄顧命亂國典宜罷吏兵以侯就  
第爽得奏疑不決投刀於地曰我亦不失作富家翁  
司農桓範勸爽以天子詣許昌發四方兵自輔爽不  
從奉駕還宮懿奏爽與何晏鄧颺桓範等謀逆族誅  
之高平陵魏明帝墓在孟津縣界何晏字平叔  
傅元字休奕韡音委



殺王凌害曹彪悉夸三族

魏王凌以將軍督揚州其甥令狐愚為兗州刺史甥  
舅並典重兵陰謀以魏主制於強臣楚王彪有智勇  
欲立之迎都許昌會愚卒凌遣將軍楊弘以廢立事  
告兗州刺史黃華華弘連名白司馬懿率軍乘水道  
討凌凌勢窮面縛被殺懿窮治其事諸相連者  
悉夸三族發凌愚塚剖棺暴尸賜楚王彪死

司馬師奪印綬貶主藩臣

懿卒以子師為撫軍大將軍錄尚書事李豐為中書  
令魏王芳數獨召豐語師知其議已以刀鐔築殺之  
芳意不平師以太后令召羣臣議以芳荒淫無度褻  
近倡優不可以承天緒奏收璽綬歸藩於齊遷之河  
內河南懷慶府

迎立起高貴公扶持六載

師欲立彭城王據太后曰彭城王季叔也今來我當  
何之高貴鄉公文帝長孫明帝弟子於禮小宗有後  
大宗之義師乃迎高貴鄉公髦於元城師使請璽綬  
迎之太后曰我見高貴鄉公小時識之欲以璽綬手

授之髦至見太后其日即位髦明帝弟東海定王霖  
之子也在位六年 高貴鄉今元城縣屬大名府

慮時危行戰討志殄權臣

機不密事無成登車用劔

血淋漓成濟刃做了冤魂

師卒弟昭自為大都督髦見威權日去不勝其忿召  
尚書王經侍中王沈散騎常侍王業謂曰司馬昭之  
心路人所知也吾不能坐受廢辱今日當自出討之  
經曰今權在其門為日久矣且宿衛寡弱陛下何所  
資用而一旦如此禍殆不測髦出懷中黃素詔投地  
曰行之決矣朕復死何懼况不必死也於是入白太  
后沈業奔走告昭呼經欲與俱經不從髦遂拔劔升  
輦率殿中宿衛蒼頭官僮鼓譟而出中護官賈充入  
與髦戰南闕下髦自用劔眾欲退太子舍人成濟問  
充曰事急矣當云何充曰司馬公畜養汝等正為今  
日今日之事無所問也濟即抽戈刺髦殞於車下  
昭入殿收經及家屬殺之昭言成濟大逆滅三族

常道公平西蜀纜方二載



司馬炎求禪位孤寡欺凌

常道鄉公名奐燕王宇之子也年十五司馬昭迎立之遣鍾會鄧艾寇蜀劉後主降後二年昭卒子炎立魏主禪位於晉遷於金墉城炎廢奐為陳留王奐至惠帝大安元年始卒後趙石勒曰曹孟德司馬仲達欺人寡婦孤兒狐媚以取天下常道鄉故城在順天府東安縣西北陳留縣名屬開封府金墉城在河南府洛陽故城西

算曹氏占中原慌慌四紀

魏自曹丕篡漢傳至陳留王奐凡五主共五十六年

敗將來撐不住付與他人

奐禪位於炎而漢祚絕

思往日逞英雄興風作浪

轉回頭如一夢滅影潛形

東吳主孫仲謀聰明智勇

吳主孫權字仲謀堅之子策之弟也自策以來據有江東策死權代領其眾操伐吳權禦守月餘操見其軍伍嚴肅歎曰生子當如孫仲謀引還後權降曹丕丕封權為吳王權遣中大夫趙咨謝丕丕問曰吳王何等主也咨曰聰明仁智雄畧之主也丕問其狀咨曰納魯肅於凡品聰也拔呂蒙於行陳明也獲于禁而不害仁也取荊州兵不血刃智也據三州虎視天下雄也屈身於陛下畧也趙咨字文楚胙城人

父虎將兄獅兒奮起江東

權父堅初討董卓卓擊求糧於袁術或謂術曰孫堅江東虎將若克董卓猶除狼而得虎也術使堅擊劉表為表軍射殺之堅子策年十七見術術以堅餘兵還策策說術曰家有舊恩在江東願助舅吳景討橫江術許之策行收兵進攻橫江拔之旋渡浙取會稽太守王朗降詔以策為討逆將軍封吳侯策復襲廬江敗之狗豫章太守華歆降曹操聞策強盛歎曰獅兒難與爭鋒矣後操聞策死即表權為討虜將軍領會稽太守橫江在和州城東南直采石渡處廬江縣名在廬州華歆字子魚



父兄死自軒昂報雙黃祖

初堅擊劉表表將黃祖戰敗令呂公設伏峴山射堅  
堅死子策立欲乘虛襲許為許貢奴客因其出獵伏  
篁竹中射之中頰創甚召張昭等曰公等善相吾弟  
呼權佩以印綬至是權西擊黃祖祖橫兩蒙衝夾守  
沔口大紮繫石千弩交射軍不得前將軍董襲司馬  
凌統各將敢死士百人被兩鎧乘大舸突入蒙衝  
裏以刀斷繼蒙衝乃橫流大兵水陸並進遂屠其城  
祖走追斬之峴山在襄陽府張昭字子布可音  
釘鎮舟石也

奄荆揚薄南海霸據金陵

權霸據江東操表為討虜將軍責權任子周瑜曰楚  
國初封不滿百里繼嗣賢能遂據荆揚至於南海今  
將軍承父兄餘資兼六州之眾有何偏泊而欲送質  
耶權先自公安徙都於鄂更名鄂曰武昌後因張紘  
言秣陵山川形勝勸權以為治所權於是作石頭城  
徙治秣陵改號建業金陵今江南上元江寧二縣  
昔楚威王以此地王氣埋金以鎮之名曰金陵  
秦始皇改秣陵吳建業宋建康即今江寧府

納魯肅任周瑜同心戮力

魯肅周瑜先依袁術知術無成乃棄官渡江從策策  
卒瑜自巴邱將兵赴襄權留與張昭共掌眾事時雖  
有江東諸郡然流寓之士皆以安危去就為意瑜謂  
權可與共成大業遂委心而服事焉因薦肅於權  
引肅合榻對飲問計大悅會劉表卒二子不協肅請  
奉命說劉備撫眾同心一意共治曹操操已下荆  
州引兵東下昭等請迎之獨肅勸毋迎操權歎息曰  
諸人持議甚失孤望今卿廓開大計正與孤同肅勸  
召周瑜定計瑜至謂權曰將軍當為漢除殘去穢况  
操自送死而可迎之耶是夜瑜復見權言人以操水  
步八十萬俱各恐懼甚不足畏願將軍勿慮權撫其  
背曰公瑾卿言至此甚合孤心獨卿與子敬與孤同  
耳此天以二人贊孤也魯肅字子敬定遠人周瑜字公瑾廬江舒人

戰三江屯夏口斫案崢嶸

時召周瑜會議瑜謂擒操正在今日瑜請得精兵數  
萬進住夏口保為將軍破之權因拔刀斫前奏案曰  
諸將吏敢復言迎操者與此案同乃罷會以瑜督三  
萬人出定水寨於三江口與操遇於赤壁大破之



將親妹鎖蛟龍錦囊計拙

權既破操權以備領荆州牧瑜分南岸地以給備備立營於公安權稍畏之以妹妻備妹才捷剛猛有諸兄風侍婢百餘人皆執刃侍立備每入心常凜凜後備以瑜所給地少自詣權求都督荆州瑜上疏曰劉備非久屈為人用者宜徙備置吳盛其宮室美女娛其耳目分羽飛各置一方今猥割地以資之恐蛟龍得雲雨終非池中物也 三國演義載孔明以錦囊三個密授趙雲臨期次第開囊依計而行備與吳夫人俱馳歸荆州瑜引兵追之有周郎妙計高天下賠了夫人又折兵之誚世謂之三氣周瑜此正史所不載

爭荆州白衣槽壞了同盟

周瑜卒魯肅代瑜領兵勸權以荆州借備共拒曹操及備得益州權令諸葛瑾求荆州備不許會聞操攻漢中備使求和於權遂分荆州以湘水為界長沙江夏桂陽以東屬權南郡零陵武陵以西屬備初魯肅勸權以曹操尚存宜且撫輯關羽與之同讐不可失也及呂蒙代肅勸權取荆州以襲羽蒙遂託病以陸

遜代蒙遜至陸口為書與羽深自謙抑羽意大安撤兵赴樊遜啓陳形狀權遂發兵以蒙為大督蒙至潯陽盡伏其精兵購艫中使白衣搖櫓作商賈人服晝夜兼行羽將糜芳傅士仁開門出降蒙入江陵得羽將士家屬皆撫慰之遂定荆州初權使至荆州備報曰曹操方欲觀兵吳會而同盟無故自相攻伐使承其隙非長計也權不聽李舜臣曰荆州吳蜀之衝孫劉爭之固也然當爭於赤壁未戰之先奈何赤壁既勝今日借荆州明日索荆州今日奪荆州明日分荆州以一州之地內自相攻而中原國賊置之度外此果何為者哉 桂陽州名屬衡州南郡即荆州府零陵縣名屬永州府武陵縣名屬常德府陸口陸水之口在武昌府通城縣北潯陽今九江府德化縣 購艫音溝鹿船名

呂蒙死陸遜承支吾元德

呂蒙既入江陵未及受封即發疾卒權以陸遜代之備痛羽没自將伐權遣遜督兵拒守戰於猊亭大破之 呂蒙 字子明

孔明相費禕來吳蜀重親



漢昭烈帝卒丞相諸葛亮遣鄧芝使吳吳絕魏和漢  
及權稱帝亮遣陳震賀吳權與盟約中分天下亮卒  
以費禕為尚書令遣宗預使吳  
權折箭為誓 費禕字文禕

### 丕觀濤歎天限屈身雄略

觀濤註見本卷要吞吳句下雄  
畧註見本卷聰明智勇句下

### 自稱尊大皇帝烈烈轟轟

漢帝禪建興七年吳王權稱皇帝改  
元黃龍後子亮嗣位謚權為大皇帝

### 傳其子會稽王年方十六

權先立太子和後潘夫人有寵生少子亮權愛之全  
公主與和有隙欲豫自結數稱亮美權遂廢和為庶  
人後封為南陽王居長沙立亮為太子權卒亮嗣位  
年方十六後孫琳廢為會稽王 全公主全琮妻權  
女也 全公  
主名魯班

### 假惺惺好問難取怒孫琳

亮親政事大將軍孫琳表奏多見問難數出中書視  
大帝時舊事問左右曰先帝數有特制今大將軍問  
事但令我書可耶琳於是稱疾不朝亮惡之陰與全  
公主將軍劉承謀誅之全后父尚為衛將軍亮使尚  
子紀語尚嚴整兵馬且曰勿令卿母知女人不曉大  
事且琳姊也紀告尚尚語紀母使人密語琳琳怒  
遂圍宮亮大怒上馬帶鞬執弓欲出曰孤大皇帝適  
子在位已五年誰敢不從者近臣牽止之不得出琳  
使光祿勳孟宗告太廟廢亮會稽謠言亮當還為天  
子吳主黜亮為侯官侯亮自殺 侯官縣名屬福州  
府

### 吳景帝逼其亡不能廢子

琳廢亮立瑯琊王休休權中子也立子暉為太子休  
寢疾口不能言手書呼丞相濮陽興入令子暉出拜  
把興臂指暉託之而卒謚曰景帝吳人以蜀初亡欲  
立長君左典軍萬或常為烏程令與烏程侯皓相善  
稱皓於興及左將軍張布與布  
遂說朱太后迎立皓 暉音灣

### 烏程侯頑且暴怎保長存



休先封兄南陽王和子皓為烏程侯休卒皓即位皓  
麤暴驕盈多忌諱好酒色大開苑囿起土山樓觀窮  
極伎巧使諸將各上御犬一犬直縑數十匹縷緹直  
錢一萬以捕兔供厨有勝已者殺之見惡者燒鋸斷  
其頭晉羊祜曰孫皓之暴過於劉禪將疑士困一入  
其境則長江非復所保也晉主使張華問策祜曰孫  
皓暴虐已甚於今可不戰而克  
烏程縣名今屬浙江湖州府

### 料難敵陸闞羊交權邊境

晉以羊祜都督荊州吳以陸抗為大司馬荊州牧督  
軍樂鄉祜與抗對境使命常通抗遺祜酒祜飲之不  
疑抗疾求藥於祜祜以成藥與之抗即服人諫之抗  
曰豈有酖人羊叔子哉抗告其邊戍曰彼專為德我  
專為暴是不戰而自服也各保分界而已無求細利  
樂鄉城名在荊州府松滋縣 羊祜字叔子泰山  
南城人陸抗字  
幼節遜之子

### 更添着鑿鼻眼何等淫刑

皓惡人視之羣臣莫敢舉目每宴咸令沉醉又置黃  
門郎十人為司過宴後各奏闕失或剝人面或鑿人

眼由是上下離心後皓降晉賈充問曰聞君在南方  
鑿人目剝人面此何刑也皓曰人臣有弑其君及姦  
回不忠者則加  
此刑充默然

### 晉武帝大興師樓船直下

晉武帝炎與羊祜謀伐吳祜表王濬加龍驤將軍大  
作舟艦濬遣別駕何攀作大艦長百二十步受二千  
餘人以木為城起樓櫓開四出門其上可馳馬往來  
炎大舉兵遣王渾杜預濬等分道伐吳預遣牙門周  
旨夜渡江襲樂鄉吳都督孫歆懼曰北來諸軍乃飛  
渡江也預進克江陵於是沅湘以南接於交廣州郡  
皆望風送印綬濬攻武昌降之遂自武昌順流而下  
徑造建業 舟艦戰船也四方施板以禦矢樓櫓城  
上守禦望樓也櫓露也上無屋覆 王濬字士治弘  
農人王渾字元冲晉陽人杜預字元凱封富陽侯朝  
野號曰杜武庫  
京兆杜陵人

### 石頭城風威利束手降臣

濬兵順流而下皓遣將軍張象帥舟師禦之望旗而  
降又遣陶濬乘大船以戰未發而潰初晉主詔濬至



建業受王渾節度濬舟師過三山渾遣信要與論事  
濬舉帆直指建業報曰風利不得泊也是日濬卒八  
萬方舟百里鼓譟入於石頭皓面縛與櫬詣軍門降  
晉封為歸命侯石頭城孫權所築在江寧府西二  
里三山磯名在太平府繁昌縣  
東北下流去蕪湖二十五里

### 五十載王氣銷江沉鐵鎖

吳自權至皓凡四主共五十九年初吳人於江積要  
害處並以鐵錐長丈餘暗置江中逆拒舟艦王濬作  
大筏數十方百餘步縛草為人披甲持杖令善水者  
以筏先行遇鐵錐輒著筏而去又作大炬長十餘  
丈大數十圍灌以麻油在船前遇鎖燃炬燒之須臾  
融液斷絕船無所礙昔楚威王以金陵有王氣吳建  
都改稱建業今濬至  
建業皓降而吳亡矣

### 盼黃旗瞻紫蓋識兆成塵

初吳人刀元詐增識文云黃旗紫蓋見於東南終有  
天下者荆揚之君皓喜遂有兼併之心舉兵出華里  
遇雪引還至是降晉而吳  
亡華里在江寧府西

### 勞攘攘幾千場將軍戰馬

### 絮叨叨三國志故紙遺文

三國志註見總  
說三國志句下

### 司馬氏總收拾江山一統

魏篡漢滅蜀晉篡魏滅吳  
至太康元年天下一統

### 啓封疆稱武帝晉室龍興

司馬炎昭之子嗣位為晉王廢魏主為陳留王稱  
皇帝是為武帝國號晉 謚法剛強直理曰武

### 火焚了雉頭裘留心儉約

太醫司馬程據獻雉頭裘帝焚於殿前詔毋得獻奇  
技異服帝承魏刻薄奢侈之後欲矯以仁儉有言御  
牛青絲紉斷詔  
以青藤代之

### 駕羊車遊內苑遽作荒淫



帝既平吳頗事游宴怠於政事選吳妓妾五千人入宮掖庭殆將萬人常乘羊車恣其所之至便宴寢宮人競以竹葉插戶鹽汁灑地以引帝車

### 最失策銷兵備養戎不徙

帝平吳後悉罷州郡兵詔曰昔在漢末四海分崩刺史內親民事外領兵馬今天下為一當韜戢干戈刺史分職當如漢氏故事悉去州郡兵大郡置武吏百人不小郡五十人交州牧陶璜上言州兵未宜約損以示單虛僕射山濤極言不宜去州郡武備帝稱之曰天下名言也而不聽及永寧以後盜賊羣起州郡無備天下遂亂漢魏以來羌胡鮮卑降者多處塞內諸郡其後數因忿恨殺害長吏漸為民害侍郎郭欽疏曰西北諸郡皆為戎居一或有警胡騎自平陽上黨不三日而至孟津矣宜及平吳之威漸徙內郡襍胡於邊地峻四夷出入之防明先王荒服之制此萬世長策也不聽太子洗馬江統作徙戎論以警朝廷不聽

### 賣官錢入私室反遜桓靈

山濤字巨源河內人江統字應元陳留人

史記

帝問司隸校尉劉毅曰朕可方漢何帝對曰桓靈帝曰何至於此曰桓靈賣官錢入官庫陛下賣官錢入私門以此言之殆不如也帝大笑曰桓靈之世不聞此言今朕有直臣固為勝之

### 傳授與不才兒南風穢烈

帝立子衷為太子時朝野咸以太子昏愚不堪為嗣帝亦知太子不才然恃太子生子通明慧故無廢立意初欲為太子娶衛瓘女賈充妻郭槐賂楊后左右使后說納其女帝曰衛氏種賢而多子美而長白賈氏種妬而少子醜而短黑后固請遂納賈氏為太子妃妃妬忌多權詐太子嬖而畏之帝崩衷即位是為惠帝立賈氏為皇后后諱南風與太醫程據等亂時洛中有南風烈烈吹黃沙之謠外史載郊外有輓小車者導一美少年入車中閉之輓而行出則一曲房也陳設非人間一主婦人年二十餘身矮面黑淫謹三晝夜少年精力疲憊婦人曰君雖有貌而無濟勝之具奈何多納金珠仍令卧車中送故處少年不解為何豪室也歸與人言狀有識者驚曰此賈后也其淫亂如此楊后名艷字瓊芝

### 肉糜癡蝦蟆蠹木偶為心



帝薨駭時天下饑饉帝曰何不食肉糜常在華林園  
聞蝦蟆鳴問左右曰此鳴者為官乎為私乎左右戲  
曰在官地為官在私地為私尹氏曰晉惠之為君動  
輒制於他之手特一木偶人而已魏明帝建芳  
林園在河南府城東北隅

### 大臣宰尚清談人無遠慮

魏嘉平中何晏好老莊書與夏侯元荀粲王弼之徒  
競為清談祖尚虛無謂六經為聖人之糟粕由是天  
下士大夫慕效之遂成風流不可復制帝以王戎為  
司徒王衍為尚書令樂廣為河南尹皆善清談行弟  
澄及阮咸咸從子修胡母輔之謝鯤王尼畢卓皆以  
任放為曠達當時爭尚浮誕廢職業呂東萊曰永嘉  
之際清言者滿朝一觴一詠傲睨萬物南山子曰高  
枕茅廬百無留念肆志竹窗一無用情元字太初  
王弼字輔嗣王戎字濬仲衍字夸甫戎之從弟澄字  
平子衍之弟樂廣字彥輔阮咸字仲容修字宣子輔  
之字彥博謝鯤字  
幼輿畢卓字茂世

### 眾親王興禍亂骨肉兵爭

初武帝懲曹氏孤立之敝大封宗室各擁重兵至永  
康元年趙王倫謀篡位遣齊王回將百人排門西入  
廢賈后自為相國淮南王允討倫不克而死倫遷帝  
於金墉自稱皇帝回及成都王穎河間王顥舉兵討  
倫誅之迎帝復位以回為大司馬輔政回驕奢專權  
顥表陳回罪使長沙王又討回斬之以穎輔政二年  
顥穎嫌又專政舉兵反帝以又督軍討之為顥將張  
方所敗又奉帝討張方不克穎進逼京師東海王越  
潛與殿中諸將夜收又置金墉城使方炙殺又顥表  
穎為皇太弟越徵顥為司徒南陽王模邀殺之頓邱  
太守執穎送鄴范陽王虓幽之會虓卒長史劉輿以  
穎素為鄴人所附殺穎後漢主劉聰問懷帝曰卿家  
骨肉何相殘如此帝曰大漢  
將應天受命故自相驅除

### 嵇侍中血淋漓蕩陰死節

初皇太弟穎僭侈日甚大失眾望東海王越奉帝征  
穎穎遣石超拒戰蕩陰帝頰中三矢百官侍御皆散  
侍中嵇紹朝服登輦以身衛帝超遂殺紹血濺帝衣  
帝墮於草中亡六璽左右欲浣帝超曰嵇侍中血  
勿浣也蕩陰縣名屬彰德府嵇紹字延祖父康  
字叔夜先本土虞人姓奚以避怨徙家嵇山因氏焉



東則東西則西中毒亡身

穎迎帝入鄴幽州都督王浚并州刺史東瀛公騰起兵討穎穎奉帝還洛陽顯將張方在洛久剽掠殆竭逼帝西遷長安帝泣從之顯隨廢穎東海王越以張方劫遷車駕傳檄討之遣祁弘等入長安奉帝東還以越為太傅帝食餅中毒崩或曰太傅越之鳩也尹氏曰晉惠制於他人之手如嬰兒玩弄於股掌之上欲東而東欲西而西一木偶人夫以漢質帝之幼沖食餅中毒尚能急召大臣了了言之今晉惠乃莫能一言故雖或曰越之所鳩然綱目不明其故直以中毒書之

懷帝立志有為傳餐親政

懷帝名熾武帝第二十五子惠帝無嗣立熾為皇太子弟至是即位帝始遵舊制於東堂聽政每至宴會輒與羣臣論衆務考經籍黃門侍郎傅宣歎曰今日復見武帝之世矣 謚法慈仁短折曰懷

痛銅鉞委荆棘受縛華林

惠帝時關內侯索靖知天下將亂指洛陽宮門外銅鉞歎曰會見汝在荆棘中耳漢主劉聰使前軍大將

呼延宴寇洛陽石勒劉曜皆引兵會宴先克宣陽門入帝出華林園門欲奔長安漢兵追執之曜自西明入殺太子詮發諸陵焚宮廟納帝后羊氏遷帝於平陽封平阿公後聰宴羣臣於光極殿使帝著青衣行酒庾珉王雋等號泣聰殺珉雋等十餘人並弒帝 索靖字幼安燉煌人羊后名獻容

愍帝立勢難支接踵繫擄

愍帝名業吳王宴之子武帝之孫初封秦王及懷帝被擄賈疋奉為太子懷帝遇害即位於長安漢劉曜攻陷長安外城麴允索緝退守小城內外斷絕城中飢甚帝泣曰今窮厄如此外無救援當忍恥出降以活士民使侍中宗敞送牋帝乘羊車肉袒出降曜送帝於平陽 謚法在國遭憂曰愍麴允金城人索緝字巨秀 靖之子

捧杯盤執傘蓋殞命胡廷

聰以帝為光祿大夫封懷安侯後聰出畋使帝戎服執戟前導見者指之曰此故長安天子也故老有垂泣者聰饗羣臣使帝行酒洗爵已而又使更衣執蓋尚書郎辛賓抱帝大哭聰命引出斬之帝遂遇害



劉元海亂倡先五胡雲擾

劉淵字元海匈奴人武帝時為左部帥後稱漢王尋稱帝邱濬曰晉之亡大率中原半為夸居劉淵匈奴也而居晉陽石勒羯也而居上黨姚氏羌也而居扶風苻氏氏也而居臨渭慕容鮮卑也而居昌黎種類日繁樂鬪喜亂是以劉淵一倡而并雍之胡乘時四起長淮之北無復晉土而為戰爭之場者幾二百年

瑯琊王走江左六代瓜分

瑯琊王司馬睿懷帝時以為安東將軍都督揚州軍鎮建業後睿即位由晉歷宋齊梁陳俱都江左與北魏共六代南北瓜分不能混一

想西晉創根基謀心不善

司馬懿染指曹鼎垂涎三世至孫炎篡魏晉論曰懿受遺輔政屢遇廢置是其創基立本異於前代者也

老仲達無比賽詭詐兇心

懿字仲達小學史斷曰晉之興始於懿自以兵動若神謀無再計弱寡欺孤恣行誅戮脅制之威同於莽

卓

螳後雀躡前踪曹瞞篡漢

曹操小名阿瞞史斷云自曹操肇謀迄於亡國五六十餘年間與司馬氏相終始所謂黃雀利於螳螂而不知挾彈者早已隨其後也

馬中牛循往事呂政承秦

元帝睿乃瑯琊王觀妃夏侯氏所生史載如與小吏牛金通生睿魏明帝青龍三年張液郡谷口水涌寶石負圖有石馬七及犧牛之象晉時又有牛繼馬後之謠自懿啓封於晉傳至愍帝而七帝之數終睿以牛吏子承晉祚而司馬之裔絕秦始皇名政乃陽翟大賈呂不韋之子冒姓嬴王姬夏侯光姬字銅環璜按升菴外傳載晉書云初元石圖有牛繼馬後故宣帝深忌牛氏遂為二榼共一口以貯酒帝先飲其佳者以毒酒鳩其將牛金而恭王姬夏侯氏竟通小吏牛氏生元帝今通鑑省其文竟云通小吏牛金而生元帝可笑也又按唐元行沖元魏之後著魏典三十卷云瑞石有牛繼馬之像舊謂元帝本出牛氏誣



辭也魏主犍之孫道武帝繼晉受命此其應也

單逞縱已之能傳家計策

不隄防天眼轉果報相尋

尹氏曰懿自殺爽之後魏國在其掌握又殺彪而盡幽置諸曹於鄴甚於操之所為自曹丕篡漢至是纔三十載天道好還豈不昭昭哉陳氏曰司馬氏八王相繼屠戮四十八王同時殲於排牆皆所以報其逼害曹氏也

翻滾滾擁將來雨摧黃潦

渺茫茫消散去風捲殘雲

從此後洛陽天無緣再覩

割江東半塊土小小乾坤

元帝即位江東為東晉五胡割裂中原而晉卒不能恢復洛陽舊都

東晉主瑯琊王白板天子

帝名睿宣帝曾孫瑯琊恭王覲之子懷帝時受詔鎮建業建興五年劉聰弒愍帝於平陽凶問至遂即位為元帝帝不由太子承襲劉曜石勒謂晉為白板天子以無璽也自洛陽視建康在東故為東晉 始建國 都曰元 謚法

化龍後賴人望建業登宸

帝先同西陽王羨等五王渡江童謠有五馬浮渡江一馬化為龍之語帝初鎮建業以安東司馬王導為謀主帝名譽素輕吳人不附導患之語帝曰賀循顧榮皆吳人之望宜引以結人心後二子應徵歸附者衆帝業遂成以避愍帝諱改建業為建康 賀循字彥先山陰人顧榮亦字彥先吳人

劉越石枕干戈聞雞起舞

司空劉琨字越石少與祖逖俱為司州主簿同寢中夜聞雞鳴逖蹴琨覺曰此非惡聲也因起舞琨為并州刺史聞逖為豫州刺史移書親故曰吾枕戈待旦志梟逆虜常恐祖生先吾著鞭 司州今河南府



祖士雅渡江楫誓掃烟塵

鎮西將軍祖逖字士雅范陽人元帝徵為軍咨祭酒  
勸帝復中原帝以為豫州刺史將部曲渡江中流擊  
楫而誓曰祖逖不能清中原而復濟者有如大江數  
破石勒北地遂平黃河以南盡為晉土 范陽今涿  
州

逆天理害無辜輕誅督運

帝為丞相時聞長安不守出師露次刻日北征然帝  
本無北伐之志以漕運稽期斬督運令史淳于伯刑  
者以刀拭柱血流上至柱末二丈餘而下觀者咸以  
為寃直司劉隗上言伯罪不至死王導等引咎請解  
職脣曰刑政失中皆吾  
闔塞所致一無所問

徒灑却新亭淚玩愒因循

江東名士遊宴新亭司徒周顛中坐歎曰風景不殊  
舉目有江河之異相視流涕王導變色曰當共戮力  
王室克復神州何至作楚囚對泣耶顧氏曰化龍之  
後宴安東南玩日愒歲迄不聞有勤王之舉 新亭

兼吳會不能復侵疆咫尺

在江寧府南一十五里神州中國名曰赤縣神  
州又一書曰王者所居吉地也 周顛字伯仁  
陳止齋曰晉元撫江東之勝兼吳會之饒而沒齒不  
能歸侵疆咫尺 一統志曰世稱吳門為吳會以其  
地本吳會二郡今按為吳東南一都會即  
蘇州府正義曰吳地為荆揚交廣之都會

王與馬共天下反了王敦

帝始鎮江東王敦與從弟導帝推心任之敦總征討  
導專機政子弟布列顯要時人語曰王與馬共天下  
後敦恃功驕恣帝惡之乃引劉隗刁協為心腹稍抑  
王氏權敦不平遂舉兵反 刁協字景純滄洲人

憂成病喪身軀傳之明帝

帝因敦反憂憤成疾崩司空王導受遺詔輔政  
太子紹即位是為明帝 謚法譖愬不行曰明

親決戰除大憝果斷剛明

帝加王導大都督討敦導聞敦疾篤帥子弟為敦發  
哀眾以敦信死咸有奮志乃騰詔列敦罪惡敦怒病



轉篤使王含錢鳳帥眾向京師舍奄至江寧帝親率諸軍襲擊破之敦尋卒鳳伏誅乃取敦屍斬之書法曰明帝奮發剛斷躬殄大憝可謂明也已矣

### 恰三年傳成帝蘇峻稱亂

明帝在位三年崩太子衍即位是為成帝庾亮王導卞壺同受顧命亮以蘇峻在歷陽終為亂下詔徵峻峻不應命知祖約怨朝廷乃請共討亮約以兵會峻詔亮督軍討之卞壺戰死亮奔潯陽峻入臺城自為驃騎錄尚書事以約為太尉歷陽今江南和州臺城在上元縣謚法安民立政曰成卞壺字望之

### 元規塵挑強賊國母憂崩

尹氏曰晉氏南渡王蘇相繼內叛幾不能保使當時處之以理峻亦未敢遽反夫何庾亮輕淺無謀橫挑強賊自速其變峻豈肯束手自詣耶峻平後亮求出為豫州刺史然雖居外鎮而遙執朝權王導不平嘗遇西風塵起舉扇自蔽徐曰元規塵汚人皇太后庾氏以兄亮違眾議首生厲階及督軍討峻兵敗身竄恐禍及族憂慮而崩謚曰明穆皇后庾亮字元規謚文康鄢陵人明帝后庾文君

### 絕裾温運甃陶入平禍難

温嶠初詣建康母崔氏固止之嶠絕裾而去陶侃以錢鳳疾侃功王敦左轉侃廣州刺史在州無事輒朝運百甃於齋外暮運於齋內人問之侃曰吾方致力中原過爾優逸恐不堪事故習勞耳及蘇峻亂嶠都督江州軍侃都督荆襄軍嶠聞建康不守號痛遣督護王愨期詣荆州邀侃赴難侃戎服登舟晝夜趨進侃督水軍向石頭嶠率步兵從白石南上峻戰馬躡斬之峻黨復立峻弟逸為主建威長史滕舍攻破石頭獲逸斬之亂遂平廣州今廣東首府白石山名在和州含山縣南温嶠字太真封始安公陶侃字士行封長沙公襲平入聲

### 王茂弘求故節見笑豪英

峻逸既誅滕舍步將曹據抱帝奔温嶠船羣臣見帝號泣請罪司徒導入石頭令取故節陶侃笑曰蘇武節似不如是導有慚色王導字茂弘封始興公

### 十七襍康帝立恩恩二載

康帝在位十七年崩太子昱即位是為康帝



成帝在位十七年崩二子丕奕俱幼庾冰說帝以國有強敵宜立長君以同母弟瑯琊王岳為嗣是為康帝在位二年崩 謚法溫柔好樂曰康

### 晉穆帝強祿立無嗣相承

帝名聃康帝太子三歲即位是為穆帝在位十七年卒無嗣 謚法布德執義曰穆

### 殷深源負虛名書空管葛

殷浩屏居十年屢辭徵辟時人擬之管葛謝尚工濛何後會稽王昱遺浩書浩乃出為揚州刺史尋督揚豫等州與桓溫疑貳護軍王羲之勸不聽浩又疏請北伐亦勸不聽屢至覆敗桓溫請廢為庶人徙信安浩既廢黜常書空作咄咄怪事字 信安今衢州府西安縣 殷浩字深源謝尚字仁祖王濛太原人羲之字逸少官右軍將軍會稽內史導從子也

### 桓元子總強兵劫制朝廷

桓溫初都督荆梁等州軍事帥師伐漢拜表即行朝廷以蜀道險遠為憂丹陽尹劉惔曰溫善博者也不

必得則不為但恐克蜀之後轉制朝廷耳溫兵至成都漢主李勢降論平蜀功加溫為征西大將軍封臨賀郡公威名大振朝廷彈之會稽王昱以殷浩有盛名引為心膂欲以抗溫溫忿之雖有君臣之跡羈縻而已八州士眾資調不為國用屢表北伐不聽至是帥眾三萬順流軍武昌朝廷大懼浩欲去位避溫吏部尚書王彪之曰且靜以待之令相王手書為陳成敗彼必旋師司馬高崧為昱草書致溫溫上疏致謝回軍還鎮後溫上疏廢浩內外大權一歸於溫矣臨賀縣名屬平樂府 桓溫字元子生末期溫嶠見之曰真英物也父彛以嶠所賞故名 溫劉惔字真長宿州人彪之字叔武

### 晉哀帝病纏身四年彈指

穆帝無子立成帝長子瑯琊王丕是為哀帝帝寢疾褚太后攝政在位四年崩 謚法早孤短折曰哀

### 海西公剛六載貶做藩臣

哀帝崩瑯琊王奕即位是為帝奕哀帝同母弟也大司馬桓溫素蓄不臣之志欲先立功河朔還受九錫反帥師征燕敗於枋頭威名頓挫參軍郗超謂溫曰明公不為伊霍之舉無以立大威權溫遂與定議以



帝素謹無過而牀第易誣乃揚言帝早有痿疾嬖人  
朱靈寶等參侍內寢三美人田氏孟氏生三男將移  
皇基温入朝諷褚太后請廢帝為東海王帝著白袷  
單衣乘犢車出神虎門兵衛送東海第温又奏廢放  
之人不可以臨黎元東海王宜依昌邑故事太后詔  
封海西縣公在位六年廢後至武帝太元十一年薨  
郟超字嘉賓  
康太后褚蒜子

### 簡文帝報獻流清談差勝

桓温廢帝奕迎會稽王昱即位是為簡文帝帝美風  
儀善容止神識恬暢然無經濟大畧謝靈運以為報  
獻之輩謝安以為惠帝之流但清談差勝耳 謚法  
平易不訾曰簡慈惠愛民曰文靈運仕宋為永嘉太  
守襲祖父元康樂縣  
公爵故世稱謝康樂

### 二年來交付與幼子儲君

簡文帝在位二年崩傳位太  
子曜年十一歲褚太后攝位

### 孝武帝相謝安圍碁破敵

曜即位是為孝武帝以謝安總中書安薦兄子元監  
江北軍太元八年苻堅入寇發長安兵八十七萬旗  
鼓相望千里都下震恐詔謝石謝元督軍八萬拒之  
元入問計安曰已別有旨既而寂然安命駕出遊山  
野親朋畢集與元圍碁賭墅安碁常劣於元是日元  
懼便為敵手元又不勝安游陟至夜乃還桓冲以根  
本為憂遣精銳三千入援安固却之時眾心危懼安  
每鎮以靖後秦兵敗安得驛書方與客圍碁攝書  
置牀上了無喜色圍碁如故客問之徐答曰小兒輩  
遂已破賊既罷還內過戶限不覺屐齒之折 按與  
安圍碁是張元晉書去一張字讀者誤為謝元張與  
謝元同名入號南北二元 謚法剛強直理曰武謝  
安字安石封太保建昌公謚文靖太康人寓越之上  
虞東山元字幼度謚獻武安兄子石安弟封南康郡  
公暨音樹田廬也桓  
冲字子幼封豐城公

### 八公山風鶴唳草木皆兵

初堅大舉入寇將軍梁成屯於洛澗陽平公苻融遣  
朱序說謝石謝元降序私與石約為內應元遣廣陵  
相劉牢之直前渡水擊成大破斬之石等水陸繼進  
秦王堅與融登壽陽城望之見晉兵部陳嚴整又望



見八公山草木皆謂晉兵顧謂融曰此亦勁敵何謂  
弱也有懼色秦兵逼肥水而陳元等引兵渡水擊之  
融馳騎畧陳馬倒為晉兵所殺秦兵小却朱序在陳  
後呼曰秦兵敗矣眾遂大奔元等乘勝追擊秦兵大  
敗自相蹈籍而死者蔽川野走者聞風聲鶴唳皆以  
為晉兵死者十七八初會稽王道子以威儀鼓吹求  
助於鍾山之神及秦人望草木如人狀神有力焉  
八公山在壽州肥水北淮水南淮南王安與其賓客  
八公登此山學仙故名洛澗二水名壽陽今壽州肥  
水在廬州府城南七十五里水出雞鳴山北流二十  
里分為二一入巢湖一流入淮水八公傳記不見  
姓名高誘以為蘇飛李尚左吳田由雷被毛被伍被  
晉昌八人

### 甫能勾倖免得苻氏僕射

苻堅本姓蒲堅祖蒲洪改姓苻畧陽臨渭氏人也初  
堅入寇下詔曰其以司馬昌明為尚書左僕射先為  
起第畧陽縣名屬漢中府

### 遠驕淫貪酒色杯酒長星

肥水捷後帝遂溺於酒色委政瑯琊王道子道子亦  
嗜酒與帝酣歌為事太元二十年長星見帝惡之於  
華林園舉酒祝曰長星勸汝一杯酒自古何有萬歲天子耶

### 信佛法敬僧尼家居撞壞

帝崇尚浮屠奉佛法立精舍於殿內引諸沙門居之  
親昵姘姆僧尼窮奢極欲近習弄權公行賄賂尚書  
令陸納望宮闕歎曰好家居織兒欲撞壞之耶僧  
曰浮屠素宏曰浮屠佛也佛者覺也將以覺悟羣生  
也按魏書浮屠正號曰佛陀聲相近也以華言譯之  
為淨覺精舍佛寺也釋迦譜曰息心所棲精練行者  
之所居又講讀之所亦曰精舍

### 被蒙頭清暑殿戲犯陰人

帝貴人張氏寵冠後宮年近三十帝戲曰汝以年亦  
當廢矣吾意更屬少者已而醉寢清暑殿貴人使婢  
以被蒙帝面而弑之重賂左右曰因魘暴崩清暑  
殿在江南上元縣東北五里臺城內乃孝武所建後  
宋孝武改曰嘉禾殿



晉安帝幼冲年紀綱破碎

安帝名德宗孝武太子年十五幼不慧口不能言寒暑飢飽不辨平北將軍王恭與殷仲堪桓元相結上表罪狀僕射王國寶將軍王緒舉兵反會稽王道子聞儒即賜國寶死斬緒於市遣使謝恭乃罷兵後恭與仲堪元楊佺期又反元陷江州上表討王愉司馬尚之兄弟朝廷憂懼恭司馬劉牢之執恭降詔以元為江州刺史佺期為雍州刺史黜仲堪為廣州刺史敕使回軍仲堪等又上疏申理王恭求誅牢之乃復以仲堪督荆益軍優詔慰諭乃罷兵還鎮尹氏曰典午衰微諸鎮闕亂至敕使回軍猶旅拒不從晉之無政可知矣顧氏曰安帝即位主暗臣驕紀綱破碎謚法好和不爭曰安

東西錄專殺柄反了孫恩

帝以道子錄尚書六條事又以會稽世子元顯錄尚書事時謂道子為東錄元顯為西錄東第門可張羅西府車騎填湊元顯性尤苛刻生殺任意孫恩乘民心騷動進攻會稽內史王凝之世奉道教不設備曰我已請大道借鬼兵守津要不足憂也恩遂陷會稽殺凝之八郡皆殺長吏應之恩自稱征東將軍號其

漢曰長生人

水仙妖煽惑民坑屠糜爛

初妖人孫泰學妖術於杜子恭士民多奉之王雅薦於武帝云知養性之方官新安太守泰收兵聚貨謀作亂道子誘斬之兄子恩逃入海愚民猶以為泰蟬蛻不死就海中資給之恩乃聚合亡命寇陷會稽所過焚掠刊木堙井醢諸縣令以食其妻子不食則支解之劉牢之使參軍劉裕擊破之恩又浮海奄至丹徒戰士十餘萬裕自海鹽倍道兼行大破之恩乃北走郁洲陷廣陵裕至郁洲又大破之恩寇臨海太守辛景擊破之恩所擄三吳男女死亡殆盡恩乃赴海死其黨從死者以百數謂之水仙

劉牢之縱反叛內指神京

桓溫幼子元先同王恭等反以為江州刺史後加都督荊州四郡事元舉兵攻江陵殺殷仲堪楊佺期表求領荊江詔以元都督八州軍事屬兵調卒久伺朝廷之隙自謂有晉國二分之一數使人上已符瑞欲

軍司主長白

卷



以惑眾張法順謂元顯曰元新得荊州人情未附若使劉牢之為前鋒大軍繼進元可取也乃下詔罪狀元以元顯為大都督劉牢之為前鋒法順至京口謀於牢之牢之以為難法順以牢之有二心勸召殺之元顯不從牢之數惡元顯欲假元以除執政復伺元隙而自取元使牢之族舅何穆說之牢之遣子敬宣詣元請降元抗表傳檄罪狀元顯舉兵東下檄至元顯大懼下船而不發聞元至新亭棄船退軍二日復出陳於宣揚門外軍中相驚言元已至南桁元顯欲引兵還宮元遣人拔刀隨後大呼曰放仗軍人奔潰元顯走入東府元收縛之元入京師自為丞相總百揆都督中外錄尚書事揚州牧徙道子於安成郡斬元顯法順等以牢之為會稽內史牢之曰始爾便奪我兵禍其至矣大集僚佐議據江北以討元叅軍劉襲曰事之不可者莫大於反將軍往年反王兖州恭近日反司馬郎君元顯今復反桓公一人三反何以自立語畢趨出佐使多散走牢之懼帥部曲北走至新州縊死音舫方舟也駕萬舟以為橋在國之南故曰南桁安成郡今吉安府

### 桓元來稱楚帝潯陽遷劫

桓元舉兵肆逆誘牢之破官軍殺元顯自總百揆篡勢已成卞範之勸元早受禪朝廷冊命元為相國封楚王加九錫表請歸藩使帝作手詔固留之範之為禪詔逼帝書之遣司徒王謐禪位於楚元遂稱帝改元永始封帝為平固王遷於潯陽元登御座而床忽陷殷仲文曰將由聖德深厚地不能載元大悅劉裕起兵討元元兵潰浮江南走至潯陽逼帝西上劉毅等追之元挾帝入江陵收集荊州兵未三旬有眾二萬復帥諸軍挾帝東下毅等戰於潯陽大破之元復挾帝入江陵元伏誅帝乃復位何無忌奉帝東遷潯陽今九江府平固縣名屬南康此南康今贛州是潯陽州在武昌府武昌縣一曰新生洲半屬黃州府黃岡縣

### 亂荒荒草澤間崛起英雄

桓元稱帝劉裕與何無忌同舟還京口密謀興復劉毅家於京口亦與無忌謀無忌曰桓氏強盛其可圖乎毅曰天下自有強弱苟為失道雖強易弱正患事主難得耳無忌曰草澤之間非無英雄毅曰所見惟劉下邳無忌笑而不答還以告裕遂與定謀平昌孟昶為桓弘主簿至建康還裕謂之曰草間當有英雄



起卿頗聞乎昶曰今日英雄正當是卿耳於是毅無  
忌昶等合謀起兵收眾濟江推裕為盟主平昌縣  
屬濟南府京  
口今鎮江府

### 劉下邳滅桓元乘機講會

劉牢之參軍劉裕先領下邳太守勸牢之擊元牢之  
不從牢之敗裕約何無忌還京口曰元守臣節常事  
之不不然當與卿圖之元稱帝裕與無忌劉毅起兵移  
檄遠近元加桓謙征討都督屯東陵下範之屯覆舟  
山西裕毅身先士卒進突其陣謙等大潰元先潛使  
殿仲文具舟至是浮江南走裕入建康誅元宗族遣  
諸將追元尚書王叔奉迎乘輿元挾帝入江陵毅連  
破之元與心腹百餘人夜出僅得至船毛修之誘元  
入蜀寧州督護馮遷遇元抽刀而前元曰汝敢殺天  
子遷曰我殺天子之賊耳遂斬之帝東還以裕都督  
十六州軍事出鎮京口陳氏曰劉裕起於無賴邂逅  
孫恩桓元之力自為蓋世之雄下邳今邳州覆舟  
山在江寧府城西北七里東連鍾  
山北臨元武湖劉宋改名真武山

### 夸劉毅殺譙縱剋滅盧循

都督荆寧秦雍軍事劉毅自謂功與裕埒既據上流  
陰有圖裕之志會毅疾篤請從弟藩為兗州刺史以  
自副裕偽許之藩自廣陵入朝裕以詔書罪毅藩謀  
不執賜藩死令王鎮惡以百舸為前驅聲言劉兖州  
主去江陵二十里舍船襲城毅覺欲閉城鎮惡已馳  
入毅帥左右突出夜投佛寺僧拒之毅縊死益州  
參軍譙縱殺刺史毛璩自稱成都王稱藩於秦封蜀  
王裕遣劉敬宣討之不克引還縱使桓謙會秦將苟  
林寇荊州裕以朱齡石為益州刺史率將軍臧熹伐  
縱別有書函封付齡石署函邊曰至白帝乃開諸軍  
雖進而未知處分所由至白帝發函曰眾軍悉由外  
水取成都臧熹從中水取廣漢老弱乘高艦從內水  
向黃虎於是諸軍前進縱果以重兵守涪城備內水  
齡石率重軍由外水碎至去成都二百里縱遣侯暉  
夾岸築城拒險齡石攻其北城克之斬暉南城亦潰  
於是舍船步進賊營望風奔潰譙棄城走自縊死初  
孫恩赴海死餘眾數千人復推恩妹夫盧循為主桓  
元欲撫安東土乃以循為永嘉太守循雖受命而與  
其黨徐道覆寇暴不已循為番禺始興諸處裕以朝廷  
新定未暇攻討即以循為廣州刺史道覆為始興相  
循開裕北伐與道覆經襲建康寇長沙南康廬陵豫  
章皆陷之江荆都督何無忌敗死豫州都督劉毅與



循戰於桑洛洲大敗其眾皆為循擄朝廷急徵裕還  
時北征將士多創病循既克二鎮兵十餘萬裕柵石  
頭淮口築查浦藥園廷尉三壘以兵守之循寇掠無  
所得謂道覆曰師老矣不如還潯陽併力取荊州道  
覆帥眾趣江陵劉道規大破之道覆單舸走裕追循  
戰於大雷循等大敗將趨豫章乃悉力柵斷左里裕  
破柵而進殺溺無算循收散卒還番禺道覆走始興  
裕遣將軍劉藩等克始興斬道覆循收兵至番禺裕  
已先遣孫處據之循圍攻不克走交州刺史杜慧度  
與戰焚其艦循潰投水死慧度斬首函送建康外  
水一統志云秦李冰既鑿離堆又開二渠一渠由永  
康過新繁入成都謂之外江水一渠由永康過郫入  
成都謂之內江水蜀人以此水濯錦鮮明又名錦江  
在廣州府城南七里永嘉縣名屬温州府番禺縣名  
屬廣州府始興郡名今韶州府桑洛州在安慶府宿  
松縣南一百九十里石頭城名淮口淮水之口也查  
浦皆壘名大雷今安慶府望江縣左里在  
南康府都昌縣西九十五里交州今安南

### 殲慕容取姚泓用兵無敵

南燕主慕容超定都廣固裕抗表伐之引舟師自淮  
入泗至下邳步進過大峴與燕兵戰於臨朐南向

是勝負未決參軍胡藩曰燕悉兵出戰臨朐守城必  
寡願以奇兵從間道取其城裕遣藩潛師攻臨朐聲  
言輕兵自海道至遂克之超驚潰裕遂北至廣固克  
其大城超入保小城裕築長圍守之超遣韓範請救  
於秦不至裕四面急攻之燕尚書悅壽開門納晉師  
超突圍走追獲送建康斬之秦主姚興定都長安興  
卒子泓即位稱皇帝裕自加中外大都督伐秦遣將  
軍王鎮惡檀道濟自淮淝向許洛鎮惡等入秦境諸  
屯守望風欵附道濟遂至許昌軍成臯榮陽虎牢皆  
降進逼洛陽秦陳留公姚洸遣將軍趙元戰死洸降  
鎮惡等進軍潼關裕引水軍發彭城自淮泗入清河  
沂河西上至潼關鎮惡請帥水軍自河入渭以趨長  
安裕許之泓使姚丕守渭橋以拒之鎮惡泝渭而上  
乘蒙衝小艦行船者皆在艦內秦人但見艦進驚以  
為神至渭橋軍士食畢登岸鎮惡密使人解放舟艦  
水急舟倏不見宣喻士卒示無歸志身先士卒大破  
丕軍泓引兵救之不戰而潰鎮惡入平朔門泓降裕  
入長安送泓至建康斬之廣固故城在青州府堯  
山之陽臨朐縣名屬青州府大峴山名在臨朐縣東  
南一百五里上有穆陵關在焉淮淝二水名許洛一  
州名滎陽縣  
名虎牢關名



劉穆之王鎮惡文武稱能

初裕起兵時問何無忌曰急須一府主簿無忌曰無過劉道民召見即署主簿裕托以心腹動止諮焉諸大處分倉卒立定累加尚書左僕射裕北伐留守建康穆之內總朝政外供軍旅決斷如流賓客輻輳求訴稟咨盈階滿室穆之目覽詞訟手答牋書耳行聽受口並酬應不相參涉悉皆瞻舉後以佐命元勳追封南康郡公初苻氏之敗王猛孫鎮惡來奔有謀斷喜論軍國大事裕伐廣固人或薦於裕與語悅之謂參伍曰吾聞將門有將信然署參軍事裕伐劉毅使鎮惡前驅卒至荊州毅縊於牛牧佛寺鎮惡身被五箭以功授龍驤將軍又從裕伐秦自誓不克關中不復濟江至潼關大破姚丕於渭橋姚泓降以功封征虜將軍安西司馬為沈田子所圖裕即位追思其功封為龍陽縣侯東莞今沂水縣屬青州府劉穆之字道民東莞人王鎮惡以五月五日生猛曰昔孟嘗君惡日生而相齊是兒亦將與吾門矣故曰鎮惡

加九錫封宋公龍行虎步

初裕北伐秦遣長史王弘還建康諷朝廷求九錫詔以裕為相國總百揆封十郡為宋公備九錫之禮裕

辭不受旋自進爵為王增封十郡復辭不受及自長安歸始受相國宋公九錫之命初裕從徐兗刺史桓修入朝桓元妻劉氏謂元曰裕龍行虎步瞻視不凡恐不為人下宜早除之元不決

就東堂下毒手讖應昌明

裕以讖文云昌明之後尚有二帝昌明孝武帝字也乃使中書侍郎王韶之密謀弑帝韶之以散衣縊帝於東堂裕稱遺詔立瑯琊王德文

晉恭帝貶零陵一年有半

恭帝名德文安帝之弟裕所立也元熙二年裕欲受禪而難於發言乃集朝臣宴飲從容曰桓元篡位鼎命已移我唱義興復平定四海今年將衰暮欲奉還爵位歸老京師羣臣莫喻其意中書令傅亮悟曰臣暫宜還都亮至建康徵裕入輔亮具詔草使帝書之帝欣然操筆曰桓元時晉已無天下重為劉公所延將二十載今日之事本所甘心遂書赤紙為詔遜於瑯琊第裕即位廢帝為零陵王即宮於秣陵縣以兵守之帝即位於安帝義熙十四年十二月廢於元熙二年四月止一年半廢於元熙二年四月弑於宋武



帝永初二年九月亦止一年平秣陵鎮即此  
秣陵縣在江寧府  
城東南秣陵橋東宋為秣陵鎮即此  
謚法尊賢讓

恭善曰

### 掩重衾活搗殺寤氣吞聲

裕以毒酒一罌授前瑯琊郎中令張偉使酖零陵王  
偉歎曰酖君以求生不如死自飲而卒裕侍中褚淡  
之王妃兄也王與褚妃共處一室自煮食於牀前飲  
食皆出褚妃故宋人莫得伺其隙至是裕令淡之往  
視妃妃出別室相見兵人踰垣而入進藥於王王不  
肯飲曰佛教自殺者不復得人身兵人以被掩殺之  
名靈媛 褚妃

### 十五帝百餘年東西兩晉

西晉四主東晉十一主共一百五十七年  
武帝都洛陽元帝都建康

### 眼巴巴空四海不見崢嶸

自元帝中興以後  
晉祚至此絕矣

### 從此後晉江山歸之劉宋

劉裕受晉禪  
建國號為宋

### 望中原徒感歎胡馬縱橫

裕先降姚泓入長安聞劉穆之卒以根本無託決意  
東還為篡位計三秦父老詣門流涕曰殘民不沾王  
化於今百年始覩衣冠人人相賀捨此欲何之乎裕  
愍然慰諭遣之留次子義真為安西將軍守關中王  
鎮惡為司馬沈田子等為參軍從事夏主赫連勃勃  
聞裕東還引兵向長安田子與鎮惡素有相圖之意  
田子矯稱裕令殺鎮惡安西長史王修討田子斬之  
義真又殺修國中大亂勃勃又陷長安義真逃歸裕  
聞義真敗未知存亡怒甚刻日北伐會知義真得免  
乃止但登城北望慨然流涕而已陳氏曰五胡疊據  
中原百姓塗炭已極裕徒欲急歸篡位使豐  
鄔之都復淪於胡裕亦坐是絕混一之望矣

### 南北史兩頭分強攻弱守

南朝宋齊梁陳北朝諸國併於魏魏後  
分為東魏西魏南北史唐李延壽撰



鬼神愁天地慘苦殺生靈

生靈血混長江水

一陣風來草木腥

豪傑千年往事漁樵一曲高歌烏飛兔走疾如梭眨眼

風驚雨過 妙筆龍韜虎略英雄鐵馬金戈爭名奪利

竟如何必有收因結果 西江月

龍爭虎鬪何時了

結果收梢事怎休

廿一史彈詞註卷之四



